

國朝耆獻類徵初編卷八十三目錄

卿貳四十三

白瀛

宋邦綏

周煌子興

覺羅阿揚阿

陳世烈

余文儀

德福子榮柱

胡寶琮

卷之三

三才圖會卷之十一 日機

卷之六

卷一百一十五

1990

卷之五

10

1875

10

199

國朝耆獻類徵初編卷八十三

通奉大夫前署江西巡撫江西布政使司布政使湘陰李桓輯
卿貳四十三

白瀛

白瀛山西興縣人乾隆二年進士改庶吉士四年散館授編修七年充會試同考官九年 駕幸翰林院分韻賦詩瀛與焉十年改陝西道監察御史先是七年 諭令各直省關口所有經過米豆應輸額稅悉行寬免永著爲例十一年七月江甯布政使兼理漕暨關事安凝以米豆免稅有損無益奏請照舊徵收 上不許瀛疏言人臣之事君也將以宣主上之恩澤而布之下民者也詩曰

其其黍苗陰雨膏之四國有王郇伯勞之然則居旬宣之任者謂
宜推廣德意奉行無弊斯稱職焉抑又聞人臣之進說於其君也
非有爲上爲德爲下爲民者不敢瀆也孟子曰我非堯舜之道不
敢陳於王前況身遭明聖尤不宜妄自菲薄此封德彝所以見譏
於天下後世也我皇上子惠元元特免各省米豆關稅務使米
穀流通兵民足食此千古未有之曠典乃臣聞邸鈔見江蘇布政
使安凝條奏以爲米豆稅之免有損無益請照舊徵收仰蒙我
皇上斷自宸衷卻其所請至明至聖何以加諸而臣尙鰓鰓過
慮者以爲我皇上御極以來蠲租賜復湛恩洪澤之布不一而
足唯賑濟災荒豁免米豆稅兩事無田窮民大有裨益此海宇之

所以均霑樂利者也安凝職司旬宣當此膏澤下沛之日理宜設法籌畫全其美而杜其弊卽如所稱胥役之賄縱商民之欺隱安凝均得而禁約之乃身爲關差不能悉心辦理以致弊竇叢生是奉行不善安凝之責也而反歸咎於米豆稅之免謂自免稅之後江南米價甚昂夫免稅而米價甚昂豈徵稅而米價反平平揆厥所由或因免稅之後吏胥人等防其夾帶百端措勒以致商民裹足不前安凝身當其事自應立法防弊務令商賈流通而反肆無稽之言阻格仁政易曰屯其膏安凝之謂也伏查前年免米豆稅之時有御史那拉善者妄奏阻撓蒙我皇上立賜罷斥天下臣民懽忻感頌今安凝仍蹈前轍臣不知其居心爲何等伏願皇

上推愛民若子之心力行仁政斷以不疑持之悠久而不爲浮議所惑則天下幸甚 諭曰安凝所奏不過在關言關白瀛所陳亦係在諫言諫至於事之應行與否朕自有定見摺中引古無稽之言爲過當至勸朕以勿惑浮議朕若果爲浮議所惑之主白瀛未必敢爲此奏也敬讀 皇祖實錄謂明之亡實亡於言官之肆爲譏訕各爲門戶以致尾大不掉不可不慎此誠洞見千古治亂之幾言官進言亦直陳其事之可行與否耳敷衍鋪張所謂欲加之罪何患無辭也十一月 命巡視臺灣事務十二年六月疏言臺灣各縣向有供應御史衙門公用於耗羨項下支銷日久弊生不可不亟加釐剔臣於到任後親查密訪深得其詳總緣上下交手

又無稽查吏胥浮冒諸弊叢生見飭該府將例設公項按款提解
交本署巡捕官辦理年終具冊查覈統計一年如於原額尙有盈
餘則畱於節省項下儻有不敷或於養廉內撥補或咨明督撫聽
其酌量籌辦十一月復言臺灣孤懸海外爲東南四省藩籬番漢
雜處民無土著率皆粵之潮惠閩之漳泉游手好閒之流偷渡來
臺各分黨羽好利輕生非平時嚴行禁止遏其萌芽窮其根株不
足以靜浮囂而固邊圉向緣督撫巡察各持意見以致上下觀望
遇事粉飾吏職日廢而民氣愈驕其所由來者漸也臣自到任數
月以來凡遇大小事件悉與督撫商酌而行務令內外通達嫌疑
悉泯使官吏無所售其捏飾地方諸務逐件實力奉行卽如查拏

偷渡以清奸匪之源嚴禁水米以絕奸匪之流其餘打降拜盟賭博竊盜等事有犯必懲雖小必除務期吏治整飭地方靖謐至於生番潛處內山本無生事之心熟番愚直性成原有奉公之意緣漢奸貪利忘生往往私入內山抽藤釣鹿或欺熟番無知奸盜邪淫無所不至以致憤怨莫訴釀成事端者有之臣見在嚴飭各地方官凡逼近內山地方有私搭草蘂零星居住者槩行驅逐其熟番社內所有生事不法之徒不時查拏毋許容畱隱匿致令混雜生事其定立界限之處見在督臣來咨徹底清查臣當督率有司殫心經理務令內外肅清以成一勞永逸之計再海外重地營伍尤關緊要臺地兵驕將惰積習已久上下相關以姑息爲安靜

畏懦者倖免無事任其跋扈貪邪者朋比作奸情同貓鼠驕兵之
盤結愈固將弁之畏縮愈甚此時已成痺痿不仁之象將來必有
潰敗難收之勢見任鎮臣陳汝鍵長厚有餘精神不足閒有設施
不中冑要以致將弁輕玩恐於積玩已久之地不甚相宜臣已將
實在情形詳悉札商督撫應參者覈實指參應調者酌量掣調見
准督臣來札逐漸查覈辦理臣仍不時畱心稽察務令兵氣安輯
將弁整頓以仰副我 皇上慎重邊疆整頓戎行之意再臺地米
穀出入歷來聚訟紛紜在內地則取之唯恐不多在臺員則禁之
唯恐不嚴臣以爲財利所在止宜設法流通不必故爲增損徒滋
弊端臺郡見存積儲四十萬猝有緩急不患無備而沿海居民仰

食甚眾自應接濟況有無相易於臺地本無所損唯是出入之閒
加意稽察使酌盈劑虛之權操之自上裒多益寡之利受之自下
此固臣所日夜籌畫不敢稍執意見貽誤公務者也奏入均報
聞十三年九月奏臺灣秋旱情形得 旨一切賑卹事宜督率地
方官善爲之臺灣不比內地更宜加意十一月 命再畱任二年
旋 命畱福建以道府題補十四年補興泉永道二十二年丁父
憂服闋補雲南迤東道尋丁母憂服闋授四川建昌道三十二年
以病乞回籍調理三十六年病痊復補四川建昌道時大小金川
不靖大兵分路進討檄赴軍營協理糧餉事務三十七年正月四
川總督桂林奏派大員分理三路糧餉令瀛駐劄木坪總理南路

甲金達夫糧驛站事二月副將軍溫福提督阿桂令往雅州運辦銅斤趕鑄礮位六月以總理軍營糧務松茂道查禮赴三雜谷土司境內照料兵行調瀛赴大營接辦十一月大兵克美諾賊巢小金川之地皆下將軍溫福以番境功噶爾拉山爲進剿金川之路令瀛於布郎郭宗迤西之簇拉角克溝設站轉運三十八年六月溫福兵潰於木果木小金川復陷於賊定邊將軍阿桂奉命整兵進討瀛仍隨營督運十一月大兵復小金川十二月阿桂奏白瀛自到軍營兩載有餘一切籌辦軍糧等事均屬黽勉實爲軍需得力之員命賞加按察使銜仍畱督辦隨營糧餉諸務三十九年正月大兵進剿金川瀛逐站督運以備轉輸六月以辦理臺站

出力下部議敘尋以兵丁糧石違例本折兼支致兵丁不敷日食
經阿桂奏參 降旨查詢四川總督富勒渾奏瀛因糧石稍形竭
蹙稟請止將官員跟役及各項夫役酌量本折兼支而於通行各
站文內未將兵丁一項劃出以致冒昧折支請交部嚴議部議降
調 命帶所降之級仍畱辦糧餉四十年八月大兵克勒烏圍直
指噶拉依 諭曰白瀛承辦軍需歷經四載自收復小金川及進
攻金川一切不辭勞瘁奮勉出力著賞戴花翎十二月補江西按
察使仍畱軍營辦事四十一年升湖南布政使四十二年調江西
布政使畱軍營覈算奏銷四十四年四月遷刑部侍郎十二月卒

右 國史館本傳

宋邦綏

宋邦綏江蘇長洲人乾隆二年進士改庶吉士旋丁父憂七年散館授編修九年七月充河南鄉試正考官十月遷侍讀十二月提督湖北學政十二年調山西學政尋 詔仍畱湖北任十五年二月奏言開報生員優劣責在教官有時教諭訓導俱係新任諸生賢否素未深知值學臣歲試報以無優劣申覆日久卽不便咨部勢必延至下次請嗣後許申明展限如報有優劣學臣查覈得入於科試補行報部下部議行十月丁母憂十八年服闋補侍講充日講起居注官尋授四川川東道二十一年遷河南按察使二十二年遷廣東布政使二十五年調山西布政使二十七年七月因

失察屬員婪贓部議降調得 旨寬免八月擢湖北巡撫二十八年二月奏言督撫莅任親查糧驛二道庫又奏軍政等冊內刪除病故參革緣事各員均 從之四月湖廣總督愛必達湖北前任臬司沈作朋俱以縱歸州盜犯張洪舜事論罪如律 上以邦綏莅任日淺亦模稜瞻徇革職畱辦隄工十月授陝西布政使二十九年以廣東布政使任內卓薦鹽運使王槩不慎降二級調用詔從寬畱任三十年授廣西巡撫三十一年九月奏言民間買賣田地例將額徵稅銀彼此推收清楚按數輸納粵省徵冊向聽里書經管或匿冊勒捐或飛灑多派臣嚴飭禁將冊編號鈐印同稅餉櫃置州縣大堂諭業戶稅契時當堂對冊過戶推收給發完糧

執照照數輸納再鬱林等處山嶺土坡見飭履勘勘墾酌借牛具
籽種以盡地利又漢土各屬舊設土勇堡卒獐獍地方設狼兵狼
目各給軍田輕其糧賦平居守禦巡防有事徵發調遣嗣因兵額
缺少田糧輾轉私售經前督臣楊應琚奏明清查臣抵任後飭催
將各兵名下田糧逐一查明造冊填給執照如有缺額未補及老
弱各兵卽行汰革募精壯充補共查出軍田十二萬餘畝給土勇
狼兵九千餘名戍守有資可無淆混 上嘉勉之有鎮安府屬之
小鎮安土司耆界連安南匪犯黃副團等糾眾出界滋事邦綏飭
屬捕置之法奏革土巡檢岑純武職並言土巡檢職卑難控制請
改設通判一整飭化導又歸順州屬之湖潤寨人戶稀少應裁原

設州同將宣化縣那南寨巡檢移駐其那南事務歸併金城寨巡
檢管理再於那波者賴者欣三村增卡一兵十土勇二十怕懷隘
爲小鎮安門戶增設把總一兵十五土勇三十令兼轄那波等村
下部議行十月奏言粵西營房墩臺大槩在山巔水湄時有風雨
摧剝潮溼朽蛀地方官隨時修補例應領公費項下支銷有在任
日久並無坍卸有甫周歲月屢經興修至汛員僅交代於離任時
而於見任不定以限期今一體保護恐塘兵恣意作踐請嗣後預
支州縣歲修公費每塘房一間酌量該地工料貴賤歲扣銀二三
錢或四五錢存庫遇修撥用交代時按日計算造報修後令營弁
查明定以瓦房保護三年草房二年如限內疾風異漲衝損傾頽